

Eine Weihnachtsgeschichte

Es Angneäs wor e Widdfraa. Sie woar schue 73 unn hoadd von e boar Pfennich Rende gelaabd. Gewohnd hoaddse innem glänne Häüsje. Zwa Schdübjen unne Köüche middere winziche Schbeis. Es woar vierzeh Dooch für Weihnochde. De Schloudfeyjcher hadd gesaad, ihr ald Öüfje wöär liedschefdich unn sie bräuchd unbedingd en näue Oufe. Daar näü Oufe hadd de ledzde boor Euro von Ijm Geschboorde aufgefresse. Sie hadd für die Weihnochde nur nouch e boor Grumben unn e wengg Eigemochdes in de Schbeis. Öwer ihr Geld woar all. Nijdemoal en Roade füänn Glingebüdel. Eijdz hoadd die Angneäs ömme Wunner gebadd. Unn sou beim Baade issere en Gedangge komme. „Wann ich unserm Herrgodd emoal schreiwe deädd. Daas hölfd gewieß.“

Also süchdse wos zu schreiwe unn fengd oo.

„Liewer Godd! Du wässd jo em Besde, wie orm ich droo sänn. Ich wäss nijd wie ich über die Feierdich soll kömm. Sou midd hunnerd Euro wöär mer schue geholfe. Wann ich dann irchendwann emoal wos überhuann, due ichs in Glingebüdel. Dou grichsedes dann wieder.“

Unn als Adress schreibdse on „Liewe Godd im Himmel“.

Wie daat Mönch von de Bousd daar Brief in die Henn grichd hoadd, schüüdelder öäschdermoul de Koub. Dann dnggder „woadd danne Doochdiejb vom Finanzamd schbiel ich en Schdrääch.“ Unn aar schdeggd de Angneäs ijen Brief in dos Bündel vom Finanzamd.

Die Fraa wu beim Finanzamd die Bousd vedääd hoadd aach öäschdemoul verwunnerd mid dem Koub geschüüdel. Näüschiered wiese woar hoadd ses Kuwer aufgemochd unn daar Brief gelaase. Ijhr sänn die Dreene komme. Wosse Ormuad. Sie nömm dann gleich e Schochdel un sommeld bei de Kolleeche. 70 Euro sänn zammkomme. Die schdeggdse innen Ömmschlooch vom Finanzamd unn gidts bei die Bousd.

Wos hoadd sich die Angneäs gefrääd. Sie kannd sich e wengg wos zum Esse gekäff unn velleicht wör zugor e glää Weihnochdsbeemje dinn. Ouff alle Fell hoaddse gleich em liewe Godd geschriewe „Liewe Godd“ schreibdse „Du housdmer e groasse Frääd gemochd. Ich sooch Dir aa Dankschüe. Nur, wann du mir wieder emoal Geld scheijggsd, bidde nijed über es Finanzamd. Die Seggel ziehe gleich die Schdüer ab.“